

Prome Minister Mike Eman durante ceremonia conmovedor den Wilhelmina Park

“Casi nos por sinti e dolor di esnan cu a bay guerra y camponan di concentracion”

DIADOMINGO cu a pasa a tuma lugar un ceremonia conmovedor den Wilhelmina Park di e develo di e estatua di Anne

Frank, kende a bira simbolo di tolerancia, compasion y amor pa prohimo. Un ceremonia carga cu simbolo y mensahenan

positivo cu a laga tur presente keda cu bunita sentimento despues. Tur hende a sinti e ola di sinceridad cu tabata reina cu den un forma of otro a toca nan curason. Un atardi bunita. Un dia pa keda recorda. Momentonan cu nos mester abriga.



Prome Minister

Mike Eman n'e ocasion unico aki a hiba palabra introduciendo e invitado special Martin Luther King III. El a bisa cu esaki ta momentonan di reflexion profundo y cu casi nos por toca cu nos mannan scuridad di historia.

“Casi nos por sinti e dolor y

sufrimento di hopi cu a bay guerra, cu a bay den camponan di concentracion y cu a wordo discrimina rond mundo”.

Eman a sigui bisa cu na momentonan cu nos ta sinti cu nos mester di guia y cu nos mester di un elevacion spiritual, nos ta wak rond di nos pa haya e guia

y e elevacion aki.

Referiendo na Martin Luther King III, Prome Minister Eman a bisa cu entre nos, nos tin un di e figuranan particular cu ta duna nos e speranza pa un mihor mañan. Un persona cu a biba den un di e momentonan mas dificil di Merca y cu n'e edad di 10 aña a perde su tata.

N'e edad ey el a mira mas violencia, a sinti mas discriminacion y dolor cu mayoria di nos lo sinti den un bida completo. Un dolor cu facilmente bo por transforma den odio, un tristesa cu bo por converti den revancha.

Ta pesey mes cu bo mester ta un persona masha special pa cambia e dolor aki den un vision pa yuda otro. Pa cambia e bashi den un plenitud pa yuda otro.

“Martin Luther King III a keda atras na edad di 10 aña cu tur e dolor aki. El a cambia e dolor aki den liderasgo pa continua den sirbi manera su tata a haci, esta encurasha mundo pa alcanza dimensionnan nobo di humanidad”.

Cu e palabranan acogedor aki Prome Minister Eman a yama dilanti Martin Luther King III, kende masha emosiona a brasa nos Prome Minister den un gesto di masha aprecio.